



ICHD
www.ichd.org
Մարդկային
զարգացման
միջազգային
կենտրոն
International
Center for
Human
Development

ՀԱՄԱՌՈՏԱԳԻՐ

ԳՈՒՆԱՎՈՐ ՀԵՂԱՓՈԽՈՒԹՅՈՒՆՆԵՐԻ
ՏԵՍԻԼԸ. ՀԱՅԱՍՏԱՆ, ԱՌՐԵՋԱՆ



19 Ս ա յ ա թ Ե ո վ ա , Ե Ր Ե Լ Ա Ն

Հեռ.՝ +3741 58-26-38, Ֆաքս՝ +3741 52-70-82, Էլ. փոստ՝ mail@ichd.org, Ինտերնետ էջ՝
www.ichd.org

Մեծ շահերի հորձանուտում

Խորհրդային Միության փլուզումից հետո արևմուտքի երկրները, արևմտյան կապիտալի վրա հիմնված միջազգային ֆինանսական կազմակերպությունները միլիարդներ ծախսեցին, տեխնիկական ու խորհրդատվական օժանդակություն իրականացրին նորանկախ հանրապետությունները զարգացման «արևմտյան» մոդելի հուն մտցնելու համար: Կառուցվածքային բարեփոխումների ավելի քան տասնամյա ժամանակահատվածը մեկ հարց պիտի լուծեր. այն պիտի նախկին ԽՍՀՄ հանրապետությունները կանխատեսելի ու «անվտանգ» ուղու վրա դներ: Որքանով է դա հաջողվել՝ այլ վերլուծության թեմա է, մինչդեռ ակտիվացող պուլսիային Ռուսաստանը նոր մարտահրավերներ առաջադրեց ավելի քան տասնամյակ առաջ որդեգրված սցենարին: Իրեն «Եվրասիական երկիր» հռչակելով՝ Ռուսաստանն սկսեց ակնհայտ ծավալապաշտական նկրտումներ ցուցաբերել հարևան երկրներում՝ վտանգելով Արևմուտքի բազմամիլիոն ներդրումների պտուղները. մի բան, որ արևածաղիկ վաճառողների մակարդակում անգամ սովորաբար չի ներվում:

Թվում է՝ որոշումն արդեն կայացվել է: ԱՊՀ երկրներում դեպի իրական ժողովրդավարություն և դեպի Արևմուտք կտրուկ շրջադարձը, կամ այն, ինչ վերջերս առավել հաճախ «հեղափոխություն» է ընդունված անվանել, այլևս պարտադիր է, նույնիսկ՝ պարտադրված:

ԱՊՀ 9 նախագահների կողմից ԵԱՀԿ դեմ ստորագրված հայտնի հայտարարությունն, ըստ էության, Արևմուտքի կողմից ընդունվեց որպես բռնադատ: Տպավորություն է ստեղծվում, որ դա չի ներվել ու չպիտի ներվի: Արևմուտքն սկսեց ուղղակիորեն «զբաղվել» այդ նույն 9 (+1) նախագահներով: Առաջին «հաջողությունները» լայն արձագանք գտան ողջ աշխարհում: Ավելին, այսօր Վրաստանի և Ուկրաինայի իմիջն արհեստականորեն բարձրացվում է, իրողություններն ու «վարդերի ու նարինջների» բերած բոնուսները ներկայացվում են ավելի վառ գույներով, քան իրականում կան: Նպատակը հստակ է. նույն ճանապարհն ընտրելու ցանկությունը խթանելու նպատակով խանդ առաջացնել հարևան երկրների հասարակությունների մոտ:

Vox populi, vos dei¹

Միջազգային հանրությունը ցանկացած խնդիր քննարկելիս հակված է Հարավային Կովկասը դիտելու որպես մեկ միասնական, համամասն խնդիրներ ու հեռանկարներ ունեցող միավոր: Հավասարության նշան է դրվում գրեթե բոլոր ոլորտների շուրջ գնահատականներում ու մոտեցումներում: Այնուամենայնիվ, վարդերի հեղափոխությունը Վրաստանին հնարավորություն տվեց վեր կանգնել հավասարության այդ նշանից: Արդյունքում այսօր նշանը գործում է միայն Հայաստանի և Ադրբեջանի համար: Օրինակ “Freedom House” միջազգային իրավապաշտպան կազմակերպության հրապարակած զեկույցում Հայաստանն ու Ադրբեջանը ժողովրդավարության տեսանկյունից կրկին հավասար ցածր մակարդակի վրա են:

Ինչ գնահատական տալ այսօրինակ իրողություններին. ճնշում անուղղակի միջոցներով, «գուճավոր» հեղափոխությունների ներմուծման և տեղայնացման փո՞րձ, թե՞, այնուամենայնիվ, անհրա-

¹ Vox populi, vos dei (լատ.)- ձայն բազմաց, ձայն Աստծո

Ժեշտ է բացել աչքերն ու համաձայնել, որ համաշխարհային թատերաբեմում մեր համեստ դերով հազիվ թե կարող ենք ակնկալել անչափ մեծ «ուշադրություն»: Անառարկելի է՝ արևմուտքն առաջարկում է իր կողմից փորձարկված ինչ-որ ճանապարհ: Իսկ վերջին ընտրությունը ժողովրդինն է:

Միևնույն ժամանակ նույն ժողովրդին, կարծես, քիչ է մտահոգում իրերի բուն դրությունը: Հայաստանը կամովին զիջեց իր ոչ վաղ անցյալում դժվարությամբ վաստակած «ժողովրդավարության կղզյակի» համբավը, իսկ Ադրբեջանը կարծես չի էլ ձգտում դրան: Չկա մրցակցություն: Մինչդեռ առկա է իներցիա. «Վրաստանում, Ուկրաինայում, Ղրղզստանում կամ այլուր հեղափոխություն է. եկեք մենք էլ անենք»: Մոտեցման կողմնակիցները բերում են հետևյալ փաստարկները. հասարակության շրջանում հասունացել է դժգոհություն ոչ միայն ներքին, այլ նաև արտաքին միջավայրի հանդեպ, հասարակությունը պատրաստակամ է և դեռ «հրապարակում է», այսինքն հեղափոխությունը վաղուց է սկսվել (օրինակ՝ որոշ փորձագետների կարծիքով Հայաստանում՝ 2003 թվականից), այնինչ լիդերները «տուն են ճողոպրել»: Ժողովուրդն այսօր էլ «դեռ փողոցում է»:

Աքիլեսյան գարշապարը

Հայաստանի ու Ադրբեջանի դեպքում խնդրո առարկան այլ, ավելի նուրբ համատեքստ ու նրբերանգներ ունի: Փորձը ցույց է տվել, որ ո՛չ ընտրությունների կեղծումը, ո՛չ ռեժիմների ավելի ու ավելի կարծրացող գործելաճը և ո՛չ էլ այլ հասարակական-քաղաքական երևույթներ ո՛չ Ադրբեջանում և ո՛չ էլ Հայաստանում չեն կարող փողոց հանել հասարակության լայն զանգվածների: Միակ խնդիրը, որն իրապես ունակ է երկու երկրներում ժողովրդական ալիք բարձրացնել այսօր, Ղարաբաղի հիմնահարցն է: Իսկ որքանով է հայ և ադրբեջանական ժողովուրդների շահերից բխում Ղարաբաղի խնդրի օգտագործմամբ պարտադրված հեղափոխության/իշխանափոխության սցենարը:

Օբյեկտիվ իրականության գույները

Ղարաբաղյան հակամարտության ներկա փուլը թե՛ Ադրբեջանում և թե՛ Հայաստանում գրեթե նույնական ազդեցություն ունի քաղաքական կոնյուկտուրայի վրա: Եթե Ղարաբաղի հարցն առժամանակ սառեցված լիներ, ապա դա մեծ խթան կհանդիսանար Հայաստանում և Ադրբեջանում քաղաքական փոփոխությունների համար: Ցանկացած քաղաքական փոփոխություն, առավել ևս հեղաշրջում, որոշ ժամանակով մեծացնում է անկայունությունը և անորոշությունից բխող վտանգը: Նման վտանգներից հասարակությունը վախենում է և գերադասում է զսպել դժգոհությունները, գնալ լճացման ճանապարհով: Սա է, թերևս, պատճառը, որ Հայաստանի և Ադրբեջանի էլիտաներին ձեռնտու է Ղարաբաղի հարցի կիսասառած և կիսատաք վիճակը: Դա միշտ զսպող ուժ է հանդիսանալու ներքաղաքական փոփոխությունների պահանջի ձևավորման համար:

Այդ դեպքում վերոշարադրյալից ակնհայտ մի հարց է առաջանում. իսկ միգուցե թե՛ Հայաստանի, թե՛ Ադրբեջանի հասարակությունների ու իշխանությունների, ինչու չէ, նաև Ղարաբաղյան խնդրի խաղաղ կարգավորման հեռանկարի համար լավագույն լուծումն արագ ու անվերապահ ժողովրդավարացման մարտահրավերը ստանձնե՞լն է:

Համառոտագիրը մշակվել է ՄԶՍԿ հունիսի 7-ի «Գունավոր հեղափոխությունների տեսիլքը» թեմայով քննարկման մասնակիցների կողմից արտահայտված կարծիքների հիման վրա: Կլոր սեղանին մասնակցում էին անկախ վերլուծաբաններ, պետական պաշտոնյաներ, միջազգային կառույցների ներկայացուցիչներ:

Քննարկումը կազմակերպվել էր անգլիական «Լինքս» կազմակերպության հետ համատեղ: